

第二八九冊

明倫彙編

官常典

行人司部

欽天監部

太醫院部

侍衛部

儀衛部

(卷)

四二

四二—四四

四五—四六

四七—四三

四三—四四

古今圖書集成

中華書局影印



古今圖書集成

中華書局影印

欽定古今圖書集成明倫彙編官常典
第四百十一卷目錄

行人司部紀事二
行人司部雜錄

官常典第四百十一卷

行人司部紀事二

唐書漢陽郡王瑒傳瑒始為郡公進王高祖使持幣遺突厥頡利可汗言和親事頡利始見瑒倨甚瑒開說示以厚幣乃大喜改容加禮因遣使隨入獻名馬後復聘頡利謂其下曰前瑒來悔不少屈之當使拜我瑒何知之既見頡利即長揖頡利怒畱不遣瑒意象自若不為屈頡利知不可劫卒以禮遣

蔣儼傳儼常州義興人擢明經第為右屯衛兵曹參軍太宗將伐高麗募為使者人皆憚行儼奮曰以天子雄武四裔畏威最爾國敢圖王人有如不幸固吾死所也遂請行為莫離支所囚以兵脅之不屈內窟室中高麗平乃得歸帝奇其節授朝散大夫為幽州司馬

韋弘機傳弘機京兆萬年人仕貞觀時為左千牛曹曹參軍使西突厥冊拜同俄設為可汗會石國叛道梗三年不得歸裂裾錄所過諸國風俗物產為西征記比還太宗問外國事即上其書帝大悅擢朝散大

夫

董晉傳晉字混成河中虞鄉人累遷祠部郎中大曆中李涵持節送崇徽公主於回紇署晉判官回紇恃有功見使者倨因問歲市馬而唐歸我賄不足何也涵懼未及對數目晉晉曰我非無馬而與爾為市為爾賜者不已多乎爾之馬歲五至而邊有司數皮償貴天子不忘爾勞敕吏無得問爾反用是望我邪諸戎以我之爾與也莫敢確爾父子軍畜馬蕃非我則誰使衆皆南面拜不敢有言還遷祕書少監

歸崇敬傳大曆初授崇敬倉部郎中充弔祭開立新羅使海道風濤舟幾壞衆驚謀以單舸載而免答曰今共舟數十百人我何忍獨濟哉少選風息先是使外國多齎金帛貿易所無崇敬囊橐惟衾衣東夷傳其清德

胡証傳証充京西京北巡邊使太和公主降回鶻以檢校工部尚書為和親使舊制行人有私覲禮縣官不能具名富人子納貲於使而命之官証請儉受省費以絕濫官之濫次漢南回鶻欲屈脅之且言使者必易國服又欲主便道疾驅者証固不從以唐官儀自將訖不辱命還拜工部侍郎

盧羣傳羣遷兵部郎中淮西吳少誠擅決司洧水溉田使者止之不奉詔命羣臨詰少誠曰是於人有利害曰臣道貴順恭恪所以為順也專命廢順雖利何有且怠於事上者固不能責其下矣少誠聽命羣又為陳古今成敗事逆順禍福皆有效所以感動之少誠悚然既置酒與賦詩又歌以慰之少誠感悅不敢桀以奉使稱旨遷檢校祕書監

李揆傳揆入為國子祭酒禮部尚書德宗幸山南揆素為盧杞所惡用為入蕃會盟使拜尚書左僕射揆辭老恐死道路不能達命帝惻然杞曰和戎者當練朝廷事非揆不可異時年少揆者不敢辭揆至蕃會長曰聞唐有第一人李揆公是否揆畏畱因給之曰彼李揆安肯來邪還卒鳳州年七十四

崔從傳從遷尚書右丞王承宗請割德棣而遣子入侍也憲宗選堪使者以命從議者謂承宗狠誦非單使可屈次魏田弘正請以五百騎從辭之惟童騎十數疾趨鎮集軍士毯場宣詔為陳逆順大節禍福之效音辭暢厲士感動承宗自失貌愈恭至泣下即按二州戶口符印上之還為山南西道節度使

韋丹傳丹以殿中侍御史召為舍人新羅國君死詔拜司封郎中往弔故事使外國賜州縣十官實以取賞號私覲官丹曰使外國不足於資宜上請安有賀官受錢即具疏所宜費帝命有司與之因著令未行而新羅立君死還為容州刺史

韓愈傳愈拜國子祭酒轉兵部侍郎鎮州亂殺田弘正而立王廷湊詔愈宣撫既行衆皆危之元稹言韓愈可惜穆宗亦悔詔愈度事從宜無必入愈至廷湊嚴兵迓之甲士陳延既坐廷湊曰所以紛紛者乃此士卒也愈大聲曰天子以公為有將帥材故賜以節豈意同賊反邪語未終士前奮曰先太師為國擊朱滔血衣猶在此軍何負乃以為賊乎愈曰以為爾不記先太師也若猶記之固善天寶以來安祿山史思明李希烈等有子若孫在乎亦有居官者乎衆曰無愈曰田公以魏博六州歸朝廷官中書令父子受旗

節劉悟李祐皆大鎮此爾軍所共聞也衆曰弘正刻
故此軍不安愈曰然爾曹亦害田公又殘其家矣復
何道衆謹曰善廷湊慮衆變疾應使去因曰今欲廷
湊何所爲愈曰神策六軍將如牛元翼者爲不乏但
朝廷顧大體不可棄之公久圍之何也廷湊曰卽出
之愈曰若爾則無事矣會元翼亦潰圍出廷湊不追
愈歸奏其語帝大悅轉吏部侍郎

北夢瑣言唐薛廷珪少師右族名流仕於袁世梁太
祖兵力日強朝廷傾動漸自尊大天下懼之孤卿爲
四鎮官告使夷門客將劉翰先來類會悉申中外孤
卿佯言不會謂謁者曰某無德安敢輒授令公拜竟
不爲屈迫受禪之後勉事於梁而太祖優容之壽考
而終中間奉命開蜀先主爲司徒館中舊疾發動蜀
送當醫人楊僕射俾攻療之孤卿致書感謝其書未
請借肩輿歸京尋醫蜀主訝之乃曰幸有方藥可俟
愈而行堅請且駐行軒公謂客將曰夜來問此醫官
殊不識字安可以性命委之乎竟不服藥而北歸
後唐相國韋公說仕梁爲中書舍人倖輅於錢塘先
是錢尚父自據一方每要姑息梁主以河北關西悉
爲勅敵又頻失利於淮海甚籍兩浙牽掣之其次又
資貢賦凡命使臣遠泛滄溟一則希其豐遺二則懼
不周旋悉皆拜之錢公亦自尊大唯京兆公長揖而
已既不辱命識者異之竟有嚴廊之拜也
遼史劉六符傳六符父慎行子六人一德三元三殿
四端五常六符四端以衛尉少卿使宋賀生辰方宴
大張女樂竟席不顧人憚其嚴還拜樞密直學士六
符有志操能文重熙初遷政事舍人擢翰林學士十

一年與宣徽使蕭特末使宋索十縣地還爲漢人行
宮副部署會宋遣使增歲幣以易十縣復與耶律仁
先使宋定進貢名宋難之六符曰本朝兵強將勇海
內共知人人願從事於宋若恣其俘獲以飽所欲與
進貢字孰多况大兵駐燕萬一南進何以禦之顧小
節忘大患悔將何及宋乃從之歲幣稱貢六符還加
同中書門下平章事及宋幣至命六符爲三司使以
受之

耶律合里只傳合里只字特滿六院夷萬董蒲古只
之後重熙中累遷西南面招討都監充宋國生辰使
館於白溝驛宋宴勞優者嘲蕭惠河西之敗合里只
曰勝負兵家常事我嗣聖皇帝俘石重貴至今典中
有石家寨惠之一敗何足較哉宋人慚服帝聞之曰
優伶失辭何可傷兩國交好鞭二百免官

宋史王延德傳延德大名人士少給事晉邸太平興國
初補殿前承旨再遷供奉官六年會高昌國遣使朝
貢太宗以遠人輸誠遣延德與殿前承旨白勳使焉
自夏州渡河經沙磧歷伊州望北庭萬五千里雍熙
二年使還撰西州程記以獻

孔維傳維爲禮記博士太平興國七年使高麗王治

問禮於維維對以君臣父子之道升降等威之序治
悅稱之曰今日復見中國之夫子也

李若拙傳若拙雍熙三年假秘書監使交州先是黎
桓制度踰僭若拙既入境卽遣左右戒以臣禮由是
桓聽命拜詔盡恭燕饗日以奇貨異物列於前若拙
一不留眄取先陷蠻使鄧君辨以歸禮幣外不受其
私觀使還上謂其不辱命遷起居舍人

韓國華傳國華雍熙中假太常少卿使高麗太宗將
北征以高麗接遼境屢爲其所侵命齎詔諭之且令
發兵西會既至其俗頗驚特險遷延未卽奉詔國
華移檄諭以朝廷威德宜亟守臣節否則天兵東下
無以逃責於是俯伏聽命使還賜緋魚

趙安仁傳景德初以安仁爲工部員外郎充翰林學
士初雍熙中太宗詔詢文武禦戎之策安仁父孚極
陳和好之利至是安仁從幸澶州會北邊請盟首命
安仁撰答書又獨記太祖時聘問書式遼使韓杞至
首命接伴凡觀見儀制多所裁定館舍夕飲杞舉燈
子曰此果嘗見高麗貢安仁曰燈檣產吳楚朝廷職
方掌天下圖經凡他國所產靡不知也今給事中呂
祐之嘗使高麗未聞有燈檣杞失於誇誕有愧色杞
既受襲衣之賜且以長爲解將辭復左社安仁曰君
將升殿受還書天顏咫尺如不衣所賜衣可乎杞乃
服以入及姚東之至又令安仁接伴東之談次頗矜
兵強戰勝安仁曰老氏云佳兵者不祥之器聖人不
得已而用之勝而不美而美之者是樂殺人也樂殺
人者不得志於天下東之自是不敢復言王繼忠將
兵陷沒不能死節而反事之東之屢稱其材安仁曰
繼忠早事藩邸聞其稍謹不知其他其敏於酬對切
中事機類如此時論翕然稱其得體上益器之自是
有意柄用安仁又集和好以來事宜及采古事作戴
斗懷柔錄三卷以獻
張耒傳耒子希一官真定府路總管累使遼及館客
遼人嘗以雄州不當禁漁界河及役白溝兩屬民爲
言希一曰界河之禁起於大國統和年今文移尚存

白溝本輸中國田租我太宗特除之自是大國侵矣立稅故名兩屬惡有中國不役之理遼人詞塞

王洙傳洙除史館修撰還知制誥嘗使契丹至鞞淀契丹令劉六符來伴宴且言耶律防善畫向持禮南

朝寫聖容以歸欲持至館中洙曰此非瞻拜之地也六符言恐未得其真欲遣防再往傳繪洙力拒之

歐陽修傳修遷翰林學士俾修唐書奉使契丹其主命貴臣四人押宴曰此非常制以卿名重故爾

王信傳信權中書舍人假禮部尚書使於金肆射都亭連中其的金人賦曰尚書得非黑王相公子孫耶

謂王德用也信得米芾書法金人寶之歸言金人必衰之兆有四在我當備之策有二上首肯之

程師孟傳師孟為給事中集賢殿修撰判都水監賀契丹生辰至涿州契丹命席迎者正南向涿州官西

向宋使介東向師孟曰是卑我也不就刻自日昃爭至暮從者失色師孟辭氣益厲叱債者易之於是更

與迎者東西向孫瑜傳瑜字叔禮博平人以父任為將作監主簿賈昌朝薦為崇文檢討同知禮院開封府判官使契丹

適西討捷書至館伴要入賀啖以厚餉瑜辭以奉使有指不肯賀

王拱辰傳至和三年復拜拱辰三司使聘契丹見其主混同江設宴垂釣每得魚必酌拱辰酒親鼓琵琶

以侑飲謂其相曰此南朝少年狀元也入翰林十五年故吾厚待之使還御史趙抃論其輒當非正之禮

異時北使援此以請將何辭拒之聶冠卿傳冠卿以兵部郎中知制誥判太常禮院糾

察刑獄奉使契丹其主謂曰君家先世奉道子孫固有昌者嘗觀所著新唐書集詞極清麗因自擊毬縱飲

命冠卿賦詩禮遇甚厚劉敞傳敞知制誥奉使契丹素習知山川道徑契丹導之行自古北口至柳河回居始千里欲夸示險遠

敞質譯人曰自松亭趨柳河甚徑且易不數日可抵中京何為故道此譯相顧駭愧曰實然但通好以來

置驛如是不敢變也順州山中有異獸如馬而食虎豹契丹不能識問敞敞曰此所謂駁也為說其聲音

形狀且誦山海經管子書曉之契丹益嘆服蘇案傳案擢侍御史知雜事判刑部使契丹還及半

道聞英宗晏駕契丹置宴仍用樂案謂送者曰兩朝兄弟國家君臣之義吾與君等一也此而可忍孰不

可忍遂為之徹樂趙槩傳槩為翰林學士聘契丹契丹主會獵請賦信誓如山河詩詩成親酌玉杯為槩勸且授侍臣劉六

符素扇寫之納袖中其禮重如此閻詢傳詢為鹽鐵判官使契丹詢頗諳北方疆理時契丹在鞞淀迂者王惠導詢由松亭往詢曰此松亭

路也胡不徑慈嶺而迂枉若是豈非夸大國地廣以相欺邪惠慚不能對

韓琦傳琦以開封府判官迎契丹使使問南朝不開打圍何也琦曰我后仁及昆蟲非時不為耳

沈遘傳遘弟括為河北西路察訪使遘蕭禧來理河東黃鬼地留館不肯辭曰必得請而後反帝遣括往

聘括詣樞密院閣故牘得須歲所議疆地書指古長城為境今所爭蓋三十里遠表論之帝以休日開天

章問名對喜曰大臣殊不究本末幾誤國事命以畫圖示禧禧始屈賜括白金千兩使行至契丹庭契

丹相楊益戒來就議括得地訟之籍數十預使吏士誦之益戒有所問則顧吏舉以答他日復問亦如之

益戒無以應謾曰數里之地不忍而輕絕好乎括曰師直為壯曲為老今北朝棄先君之大信以威用其

民非我朝之不利也凡六會契丹知不可奪遂舍黃嵬而以大池請括乃還在道圖其山川險易迂直風俗之純麗人情之向背為使契丹圖抄上之

蘇頌傳頌為右諫議大夫使契丹遇冬至其國曆後宋曆一日北人問孰為是頌曰曆家算術小異遲速

不同如亥時節氣交猶是今夕若踰數刻則屬子時為明日矣或先或後各從其曆可也北人以為然使

還以奏神宗嘉曰朕嘗思之此最難處卿所對殊善因問其山川人情向背對曰彼講和日久頗竊中國

典章禮儀以維持其政上下相安未有離貳之意昔漢武帝自謂高皇帝遺朕平城之憂雖久勤征討而

匈奴終不服至宣帝呼韓單于稽首稱藩唐自中葉以後河隍陷于吐蕃憲宗每讀貞觀政要慨然有收

復意至宣宗時乃以三關七州歸于有司由此觀之外國之叛服不常不繫中國之盛衰也願意蓋有所

諷神宗然之頌判尚書吏部因陞對神宗謂頌曰欲修一書非卿不可契丹通好八十餘年盟誓聘使禮

幣儀式皆無所考據但患修書者遷延不早成耳然以卿度此書何時可就頌曰須一二年日果然非卿

不能如是之敏也及書成帝讀序引喜曰正類序卦之文賜名魯衛信錄

錢惟演傳縶字穆父惟演從弟易子彥遠之子也歷提點京西河北京東刑獄奉使弔高麗外意頗謂欲結之以北伐縶入請使指帝曰高麗好文又重士大夫家世所以選卿無他也乃求呂端故事以行凡餽餽非故所有者皆弗納歸次紫燕島王遣二吏追餉金銀器四千兩縶曰在館時既辭之矣今何爲者更泣曰王有命徒歸則死且左番已受縶曰左右番各有職吾唯例是視汝可死吾不可受竟却之還拜中書舍人

蘇轍傳轍權吏部尚書使契丹館客者侍讀學士王師儒能誦洵賦之文及轍伏斧鉞恨不得見全集

呂大防傳呂大防爲翰林學士權開封府館伴契丹使其使點語頗及朝廷大防密通其隱事詰之曰北朝試進士至心獨運賦不知此題於書何出使錯還不能對自是不敢復出媼詞

范雍傳雍子宗傑宗傑子奇人判將作監使於遼導者改路回遠子奇謂曰此去雲中有直道旬日可至何爲出此導者又欲沮子奇下馬館門外子奇曰異時於中門下馬今何以輒易導者計屈

韓億傳億子綜遷三司戶部判官同修起居注使契丹契丹主問其家世綜言億在先朝嘗持禮來契丹主喜曰與中國通好久父子俱使我宜酌我酒綜率同使者五人起爲壽契丹主亦離席酬之歡甚既還陳執中以爲生事出知滑州綜嘗爲契丹館伴使使者欲爲書稱北朝而去契丹就綜曰自古未有建國而無號者使慚遂不復言其後朝廷擇館伴契丹使者帝曰孰有如韓綜者乎

洪皓傳皓子邁遷左司員外郎紹興三十二年春金主襲遣左監軍高忠建來告登位且議和邁爲接待使知閣門張掄副之上謂執政曰向日講和本爲梓宮太后雖屈己卑辭有所不憚今兩國之盟已絕名稱以何爲正疆土以何爲準朝見之儀歲幣之數所宜先定及邁掄入辭上又曰朕料此事終歸於和欲首議各分而土地次之邁於是奏更接待禮數凡十有四事自渡江以來屈己含忍多過禮至是一切殺之用敵國體凡遠迎及引接金銀等皆罷既而高忠建有貴臣禮及取新復州郡之議邁以聞且奏言土疆實利不可與禮際虛名不足惜禮部侍郎黃中問之亟奏曰名定實隨百世不易不可謂虛土疆得失一彼一此不可謂實兵部侍郎陳俊卿亦謂先正名分名分正則國威張而歲幣亦可損矣進起居舍人時議遣使報金國聘三月丁巳詔侍從臺諫各舉可備使命者一人初邁之接待也既持舊禮折伏金使至是慨然請行於是假翰林學士充賀登位使欲令金稱兄弟敵國而歸河南地夏四月戊子邁辭行書用敵國禮高宗親札賜邁等曰祖宗陵寢隔闕三十年不得以時灑掃祭祀心實痛之若彼能以河南地見歸必欲居尊如故正復屈己亦何所惜邁奏言山東之兵未解則兩國之好不成立燕金閣門見國書呼曰不如式抑令人於表中改陪臣二字朝見之儀必欲用舊禮邁初執不可既而金鎖使館自旦及暮水漿不通三日乃得見金人語極不遜大都督懷忠議欲質留左丞相張浩持不可乃遣還七月邁回朝則孝宗已即位矣殿中侍御史張震以邁使金辱

命論罷之

陸佃傳佃遷吏部尚書報聘于遼歸半道聞遼主洪基喪送伴者赴臨而返詣佃曰國哀如是漢使殊無弔唁之儀何也佃徐應曰始意君匍匐哭踊而相見即行弔禮今偃然如常時尚何所弔伴者不能答范雍傳雍子宗傑宗傑子奇子奇子坦字伯履以父任爲開封府推官金部員外郎大理少卿改左司員外郎押伴夏國使應對合旨賜進士第權起居舍人使於遼復命具語錄以獻徽宗覽而善之付鴻臚令後奉使者視爲式遷殿中監知開封府再命使遼時輿邊議非時遣使以觀釁坦以不宜始禍辭其行徽宗怒責舒州團練副使

林據傳據爲翰林學士初朝廷數取西夏地夏求援於遼遼爲請命據報聘蔡京密使激怒之以起變入境盛氣以待遼者小不如儀輒辨詰及見遼主始跪授書即抗言數夏人之罪謂北朝不能加責而反爲之請禮出不意遼之君臣不知所答及辭遼使據附奏求還進築夏人城柵據答語復不異遼人大怒空客館水漿絕煙火至舍外積潦亦汚以矢溲使饑渴無所得如是三日乃遣還凡饗餼祖犒皆廢歸復命議者以爲怒鄰生事猶除禮部尚書既而遼人以失禮言出知潁州王雲傳雲字子飛澤州人父獻可仕至英州刺史知瀘州黃庭堅謫於涪獻可遇之甚厚時人稱之雲舉進士從使高麗撰鷄林志以進擢祕書省校書郎王綸傳綸紹興二十八年除同知樞密院事二十九年六月朝論欲遣大臣爲泛使覘敵且堅盟好綸請

行乃以爲稱謝使曹勛副之至金館禮甚隆一日急召使人金主御便殿惟一執政在焉連發數問綸條對金主不能屈九月還朝入見言鄰國恭順和好皆陛下威德所致宰臣湯思退等皆賀然當時金已謀犯江特以善意給綸耳綸舊疾作力丐外除資政殿大學士知福州上解所御犀帶賜之明年知建康府兼行宮留守敵犯江綸每以守禦利害驛聞上多從之

章誼傳誼遷樞密都承旨紹興四年金遣李永壽王翊來求還劉豫之俘及西北人在東南者又欲畫江以益劉豫時議難之欲遣大臣爲報使參政席益以母老辭薦誼爲代加誼龍圖閣學士充軍前奉表通問使給事中孫近副之誼至雲中與粘罕兀室論事不少屈金人論亟還誼曰萬里銜命兼迎兩宮必俟得請金人乃令蕭慶授書併以風聞事實誼誼詰其所自金人以實告乃還至南京劉豫留之以計得歸帝嘉勞之擢刑部尚書初席益薦誼使金帝曰誼亦母老朕當自諭之誼聞命略無難色戒其家人勿使母知將行告母曰是行不數月即歸大似往年太學謁告時爾及還母竟不知其使金也

韓肖胄傳肖胄紹興三年拜端明殿學士同食書樞密院事充通問使以胡松年副之肖胄慨然受命時金酋粘罕專執政方恃兵強持和戰離合之策行人皆危之肖胄入奏曰大臣各循己見致和戰未有定論然和乃權時之宜他日國家安疆軍聲大振誓當雪此讎恥今臣等行或半年不返命必復有謀宜速進兵不可因臣等在彼而緩之也將行母又語之曰

汝家世受國恩當受命即行勿以我老爲念帝稱爲賢母封榮國夫人肖胄至金國金人知其家世甚重之往返纔半年自帝即位使者凡六七年未嘗報聘至是始遣人偕來肖胄先北使入對與朱勝非議不合力求去以舊職知溫州提舉臨安府洞霄宮

京鐘傳鐘累遷右司郎官金遣賀生辰使來上居高宗喪不欲引見鐘爲償佐以旨拒之使者請少留闕下鐘曰信使之來以誕節也誕節禮畢欲留何名乎使行上嘉其稱職轉中書門下省檢正諸房公事金人遣使來弔鐘爲報謝使金人故事南使至汴京則賜宴鐘請免宴郊勞使使康元弔等不從鐘謂必不免宴則請徹樂遣之書曰鐘聞鄰喪者春不相里殯者不巷歌今鐘銜命而來緊北朝之惠者是荷是謝北朝勤其遠而憫其勞遣郊勞之使藏式宴之儀德莫厚焉外臣受賜敢不重拜若曰而必聽樂是於聖經爲悖理於臣節爲悖義豈惟貽本朝之羞亦豈昭北朝之懿哉相持甚久鐘即館相禮者趨就席鐘曰若不徹樂不敢即席金人迫之鐘弗爲動徐曰吾頭可取樂不可聞也乃帥其屬出館門甲士露刃向鐘鐘叱退之金人知鐘不可奪馳白其主主歎曰南朝直臣也特命免樂自是恆去樂而後宴鐘孝宗聞之喜謂輔臣曰士大夫平居執不以節義自許有能臨危不變如鐘者乎使還入見上勞之曰卿能執禮爲國家增氣朕將何以賞卿鐘頓首曰北人畏陛下威德非畏臣也正使臣死於北庭亦臣子之常分耳敢言賞乎故事使還當增秩右相周必大言於上曰增秩常典爾京鐘奇節今之毛遂也惟陛下下念之乃命鐘

權工部侍郎四川關帥以鐘爲安撫制置使兼知成都府

施師點傳乾道八年師點假翰林學士知制誥兼侍讀使金致命金廷立班既定相儀者以親王將至命師點退位師點屹立相儀者請數四師點正色曰班立已定尚欲何爲不肯少動在廷相顧駭愕知其有守不敢復以爲請九年使還有言其事於上者上嘉歎不已及後金使賀正旦至關問館伴師點今居何官館伴宇文价于班列中指師點以示之金使恍然曰一見正人令人眼明

范成大傳隆興再講和失定受書之禮上嘗悔之遷成大起居郎假資政殿大學士充金祈請國信使國書專求陵寢蓋泛使也上面諭受書事成大乞併載書中不從金廷使者慕成大名至求巾幘効之至燕山密草奏具言受書式懷之入初進國書詞氣慷慨金君臣方傾聽成大忽奏曰兩朝旣爲叔姪而受書禮未稱臣有疏摺笏出之金主大駭曰此豈獻書處耶左右以笏標起之成大屹不動必欲書達旣而歸館所金主遣伴使宣旨取奏成大之未起也金庭紛然太子欲殺成大越王止之竟得全節而歸

張詔傳詔字君卿成州人少隸張俊帳下積功守和州嘗被旨介聘一日金人持所繪祐獻二陵像至館中皆北地服詔向之再拜館者問之答曰詔雖不識其人但龍鳳之姿天日之表疑非北朝祖宗也敢不拜孝宗聞而喜之由是驟用

丘密傳密遷樞密院檢詳文字被命接伴金國賀生辰使金曆九月晦與統天曆不合密接使者以恩意

乃徐告以南北曆法異同合從會慶節正日隨班上壽金使初難之卒屈服孝宗喜謂雷曰使人聽命成禮而還卿之力也

劉甲傳甲字師文以樞密院檢討兼國史院編修官實錄院檢討官使金至燕山伴宴完顏者名犯仁廟嫌諱甲力辭完顏更名修自紹興後凡出疆遇忌俱辭設宴皆不得免奉檜所定也九月二十三日金宴甲以宣仁聖烈后忌辭還除司農少卿

雲麓漫抄陶穀使吳越錢王因舉酒令曰白玉石碧波亭上迎仙客陶對曰口耳王聖明天子客錢塘宣政間林樞使契丹國中薪爲碧室云如中國之明堂伴使舉令曰白玉石天子建碧室林對曰口耳王聖人坐明堂伴使云奉使不識字只有口耳王却無口耳王林詞屈罵之幾辱命彼之大臣云所爭非國事豈可以細故成隙遂備牒奏上朝廷一時爲之降黜後以其罵契丹進用至中書侍郎

筆記內侍都知閻承翰質直強幹景德初契丹方睦於我聘使往來凡百饋贈與程式未定俾承翰專掌其事執政間有欲以漢衣冠賜彼來使者承翰以爲不可曰南北異宜請各從其土俗而已上以承翰所議爲定

景德中契丹通好首命故給事中孫公僅奉使而往泊至彼國屬修聘之始迎勞饗餼頒給之禮殊未詳備北人館待優異務在豐腆無所不至然事或過差僅必抑而罷之自餘皆爲隨事損益俾豐腆中度而後已迄今信使往復不改其制

詩遠主曰卿能道我爲卿飲靖舉曰夜宴設選厚盛臣拜洗受賜兩朝厥荷好遇情感勒厚微臣雅魯拜祝若祐聖壽鐵擺高俱可忒極無主大笑遂爲酬觴劉沆亦使遠使凌壓之契丹館客曰有酒如澠繫行人而不往沆應聲曰在北爲狄吹出塞以何妨仁宗待遠有禮不使纖微迂之二公俱謫官

清波雜志康定二年劉渙奉使入西羌招納喃厮囉族部著法唯僧人所過不被拘留資給飲食渙乃落髮僧衣

澠水燕談錄康定中趙元昊既虜劉平遂約吐蕃毋與中國通陰相爲援朝廷患之擇能使絕域者將以恩信譙讓喃氏尚書屯田員外郎劉渙上書請行間道馳至青唐城喃氏皆頓首悔謝請以死捍邊因圖畫其地形并誓書還奏仁宗嘉歎進直昭文館俄而元昊臣服再加刑部郎中賜金紫

夢溪筆談李士衡爲館職使高麗一武人爲副高麗禮幣贈遺之物士衡皆不關意一切委於副使時舩底疎漏副使者以士衡所得繖帛藉舩底然後實己物以避漏濕至海中遇大風舩欲傾覆舟人大恐請盡棄所載不爾船重必難免副使倉惶取船中之物投之海中便不暇揀擇約投及半風息船定既而點檢所投皆副使之物士衡所得在船底一無所失

鄴幾雜志韓忠憲使遼其介劉太后之姻庸而自專私與遼使云太后言兩朝歡好傳云子孫韓了不知忽置一筵遣臣來伴因問太后有此語何故不傳忠憲答云皇太后每遣使使人簾前受此語戒使人令慎重爾于是以手頂禮云兩朝生靈之福也

老學庵筆記仁宗皇帝慶曆中嘗賜遼使劉六符飛白書八字曰南北兩朝永通和好會六符知貢舉乃以兩朝永通和好爲賦題而以南北兩朝永通和好爲韻云出南朝皇帝御飛白書六符蓋爲遼畫策增歲賂者然其尊戴中國尚如此則盟好中絕誠可惜也

春渚紀聞元祐三年遼賀正使劉霄等入賀東坡與秋詠館伴錫燕回始行馬而公馬小蹶劉即前訊曰馬驚無苦否公應之曰銜勒在御雖小失無傷也

畫境錄元祐末宇文昌齡命稱聘契丹皇城使張瑛价焉張瑛齡樞府難其行瑛哀請故事死於遼朝廷恩數甚渥還棺銀裝校三百兩既行瑛飲冷食生無忌昌齡戒之不納既至遼境益甚昌齡頗患之禁從者無供瑛怒罵不足果病瘵不納藥至十許日一行人病之既而三病三愈竟不復命登對進前上面晒之退語近臣曰張瑛生還奈何諸政堂諸公大笑昌齡直被他害殺每夜使人防視若有些好惡只是自家不丁至其家婦孫睥睨阿翁刻地又却來也

揮塵後錄紹聖初孟后廢處道宮偶遼國遣使來詔命邢和叔館之邢白時宰章于厚曰北使萬一問及瑤華事何以爲詞子厚曰當云罪如詔書已而北人不及之忽問曰南朝近日行遣元祐人何邪邢即以子厚語答之歸奏泰陵大喜以謂善於專對

老學庵筆記趙相挺之使金方盛寒在殿上金主怒顧挺之耳愕然急呼小臣指示之蓋闔也俄持一小玉合子至合中有藥色正黃塗挺之兩耳周匝而去其熱如火既出殿門主客者揖賀曰大使耳若用藥

遲且拆裂缺落甚則全耳皆墮而無血扣其玉合中藥爲何物乃不肯言但云此藥市中亦有之價甚貴方七直錢數千某輩早朝遇極寒則塗少許吏卒輩則別有藥以孤湯調塗之亦效

却掃編政和中杜相充以列卿使遼時新更左右僕射爲太宰少宰既至遼館伴者問南朝新定宰相官名亦有據乎杜曰會讀周禮否館伴者不悅曰周禮豈不嘗讀正以周官太宰卿一人則天官之長也小宰中大夫二人其屬耳安得相抗而爲二宰哉杜無以應及還以失言被黜

老學庵筆記魏道弼參政使金人軍中抗辭不撓金人大怒欲於馬前斬之揮劍垂及頸而止故道弼頭微偏

國老談苑趙世長以宗正卿北使時九月既宴薦瓜主客舉謂世長曰北方氣候誠早彼想未也世長對曰本朝來歲季夏此味方盛故知其節物晚也

貴耳集孝廟在御北使進國書必起御座三步中貴取進忽賀正使至殿上去御座數十步必欲屈萬乘親臨移時不決知閣王抃忽撒起國書云駕典虜使失儀而孝廟喜王抃之機捷孝廟聖語云在朝無一人乞斬北使者毘陵丁逢以選人上書乞斬北使不執臣禮以存中國之體孝廟大喜即改京秩

老學庵筆記淳熙己酉金國賀登寶位使自云悟室之孫喜讀書著作郎權兵部郎官鄧千里館之因遊西湖至林和靖祠堂忽問曰林公嘗守臨安耶千里笑而已

貴耳集石湖范至能成大以中書舍人爲祈請使至

鹵庭頗立節葛王臨辭有言曰天下是天下之天下有德者得之但使宋帝修德而已不憂天下之不歸壽皇所以聖德日新基於此也

老學庵筆記謝子肅使回云金羣臣自徒單相以下大抵皆白首老人徒單年過九十矣又云金姓多三兩字又極怪至有姓斜卯者己酉春金移文境上曰皇帝生日本是七月今爲南朝使人冒暑不便已權改作九月一日其內鄉之意亦可嘉也

貴耳集壽皇議遣湯鵬舉使金沈詹事樞在同列間發一語操吳音曰官家好歡此語遂達於上大怒差四從官審責沈會與不曾有此語對云臣有此語即日謫錫州湯侍御史使金壽皇專差中貴貽貽等人使回程先取國書星夜以聞壽皇得之啓匣元封不開國書復回湯以專對失職得謫湯以先言有驗得歸

謝文昌源明館伴北使時寧廟初即位定冊時諸臣頗有議論北使忽問謝云伊尹放太甲於桐此何義指光宗屬疾而言謝答曰有伊尹之志則可無伊尹之志則不可避一篡字朝論甚偉

金史劉著傳皇統元年著充江南封冊使假中書侍郎既至臨安而宋人勝其居曰行宮著曰未受命而名行宮非也請去勝而後行禮宋人驚服其有識欲厚賄說之奉金珠三十餘萬而著不之顧皆歎曰大國有人焉

梁肅傳肅改刑部尚書宋主屢請免立受國書之儀世宗不從及大典尹璋爲十四年正旦使宋主使人就館奪其書而重賂之璋還杖一百五十除名以肅

爲宋國詳問使其書略曰盟書所載止於帝加皇字免奉表稱臣稱名再拜量減歲幣使用舊儀親接國書茲禮一定於今年今知歲元國信使到彼不依禮例引見輒令迫取於館姪國體當如是耶往問其詳宜以誠報肅至宋宋主一一如約立接國書肅還附書謝其略曰姪宋皇帝謹再拜致書於叔大金應天興祚欽文廣武仁德聖孝皇帝閣下惟十載運盟之久無一毫成約之違獨顧禮文宜存折衷矧辱函封之貺尚循躬受之儀既俯迫於輿情常屢伸於誠請因歲元之來使遂商推以從權敢勢將命之還先布鄙悰之懇自餘專使肅控請祈肅還至泗州先遣都管趙王府長史馳滿蒲馬入奏世宗大喜欲以肅爲執政左丞相良弼曰梁肅可相但使宋還即爲之宋人自此輕我矣上乃止

張通古傳通古易州易縣人除中京副留守爲詔諭江南使宋主欲南面使通古北面通古曰大國之卿當小國之君天子以河南陝西賜之宋宋約奉表稱臣使者不可以北面若欲貶損使者使者不敢傳詔遂索馬欲北歸宋主連命設東西位使者東面宋主西面受詔拜起皆如儀使還聞宋已置戍河南謂送伴韓肖胄曰天子裂壤地益南國南國當思圖報大恩今輒置守戍自取嫌疑若與師問罪將何以爲辭江左且不可保况齊乎肖胄惶恐曰敬聞命矣即馳白宋主宋主遂命罷戍通古至上京具以白宗幹及其部置未定當議收復宗幹喜曰是吾志也即除參知行臺尚書省事

黃久約傳久約授左諫議大夫兼禮部侍郎爲賀宋

生日副使至臨安適館伴使病宋人議欲以副使代行使事久約曰設副使亦病又將使都轄掌儀輩行禮乎竟令國信使獨前行副使與館伴副使聯騎如故乃終禮而還

元史速哥傳速哥蒙古怯烈氏世傳李唐外族父懷都事太祖嘗從飲班水居河水速哥爲人外若質直而內實沉勇有謀雅爲太宗所知命使金因俾覘其虛實語之曰卽不還子孫無憂不富貴也速哥頓首曰臣死職耳奉陛下威命以行可無慮也帝悅賜所常御馬至河金人閉之舟中七日始登南岸又三旬乃達汴及見金主曰天子念爾土地日狹民力日疲故遣我致命爾能共修歲幣通好不絕則轉禍爲福矣謁者令下拜速哥曰我大國使爲爾屈乎金主壯之取金卮飲之酒曰歸語汝主必欲加兵敢率精銳以相周旋歲幣非所聞也速哥飲畢卽懷金卮以出速哥雖伴爲不智而默識其地理扼塞城郭人民之強弱旣復命備以虛實告且以所懷金卮獻帝喜曰我得金於汝手中矣復以賜之

輟耕錄翰林學士元文敏公明善字復初清河人參議中書日會朝廷遣蒙古大臣一員使交趾公副之將還國之僞主賁以金蒙古受之公固辭僞主曰彼使臣已受矣公獨何爲公曰彼所以受者安小國之心我所以不受者全大國之體僞主歎服
中州野錄徐芳谷字明善鄱陽人至正間任江西等處提舉嘗奉使交趾國其王子陳日炫聞公善詩舉卮酒立召索吟公遂口占云乘傳入南中雲章照海紅天邊龍虎氣南徼馬牛風日月八荒燭車書萬里

同丹青入王會茅土祚無窮日炫遂納款奉貢公聲名大振

見聞錄侯璉永樂鄉試第一交趾黎麟請命公輔禮部侍郎章公往錫封至其境關門低且隘先驅者謂當偃度公止之曰此中國所謂狗竇也于土人出入則宜今天命下臨不可由此度迂者驚愕爲撤關而入由是蠻人益謹禮不敢肆既歸毫髮無所受

宣廟嗣位交趾黎利弗靖成山侯王通等用兵無功時廬陵羅公簡爲御史陞工部右侍郎與李琦等齎璽書諭利未至而通與利和自率衆出境矣衆止公勿往公曰王通師敗辱國我受命諭賊可退縮不進乎賊雖凶暴必不敢拒詔與琦亟馳至其國宣上恩意利惶恐率其屬拜自首其過遣使獻金又奉表詣關稱謝且請立陳氏之孫嵩復命公往立之既至利以嵩已死乃張筵列女樂設宴公叱曰嵩死爾國人安可淫樂盡擊破其尊壘樂器時天晴忽陰風起大雨雷震焚利居室利懼貢方物表謝還朝

行人司部雜錄

續明道雜誌嘉祐中韓魏公當國遣使出諸道以寬恤民力爲名使既行魏公大悔之每見外來賓客必問寬恤使者不擾郡縣否意恐詔使騷擾民重不安也無幾皆罷之王荆公行新法每遣使其大者曰察訪小至於興水利種稻田皆遣使使者項背相望於道荆公嘗言讀大小雅言周文武故事而小雅第二篇便言皇皇者華君遣使臣故遣使爲先務二公所見如是

讀書鏡宜和時傳忠肅公察爲接伴使時金人已渝盟公至燕山聞幹離不入寇或勸其毋遽行公曰銜命而行開難而止若君命何遂去不顧陳忠肅公過庭當金人再犯京師議割兩河須大臣皆行聶昌耿南仲皆以事辭公曰主憂臣辱臣願效死欽宗揮涕嘆息遣之壯哉兩忠肅也苟有聞二公之風者則奉使渡海必不捐印而還遣勒出關自當膏車而去庶幾所謂東西南北惟上所使者歟

西峯淡話國初差行人極易故行人官極多而資格亦不貴後則不然矣如民有輸粟千石以上者必降璽書使行人至其家旌爲義民此蓋鄭重獎掖不行人固易差璽書豈易降其家乎今於報功旌善俱草草矣人焉肯自奮

欽定古今圖書集成明倫彙編官常典
第四百十二卷目錄

欽天監部彙考

上古 太昊伏羲氏一則 黃帝有應氏一則 少昊金天氏一則 顓頊高陽氏一則

陶唐氏 帝堯一則

周 總一則

漢 總一則

後漢 總一則

晉 總一則

宋 總一則

南齊 總一則

梁 總一則

陳 總一則

北魏 孝文帝太和一則

北齊 總一則

北周 總一則

隋 總一則 煬帝大業二則

唐 總一則

遼 總一則

宋 總一則 太宗太平興國一則

金 總一則

元 總一則 成宗元貞一則

明 總一則 太祖洪武七則 孝宗弘治二則 武宗正德二則 世宗嘉靖三則 穆宗隆慶一則 神宗萬曆一則

皇清 總一則 康熙二則

欽天監部總論

風俗通 論占候

性理會通 論官

官常典第四百十二卷

欽天監部彙考

上古

太昊伏羲氏命吳英為潛龍氏造甲曆

按史記補三皇本紀不載 按外紀太昊時有龍馬

負圖出於河之瑞因而名官始以龍紀號曰龍師命

吳英為潛龍氏造甲曆起於甲寅支干相配為十二

辰六甲而天道周矣歲以是紀而年不亂月以是紀

而時不易晝夜以是紀而人知度東西南北以是紀

而方不惑

按古三墳伏羲氏燧人子也因風而生故風姓末甲

八太七成三十二易草木草生月雨降日河汎時龍

馬負圖圖出後二成二十二易草木木枯月命臣飛

龍氏造六書後草木一易木王月命臣潛龍氏作甲

曆 天皇伏羲氏策辭於末甲八太七成三十二易

草木草生月天雨降河龍馬負圖後二成二十二易

草木皇曰命子襄居我飛龍之位主我圖文後一易

草木皇曰命子英居我潛龍之位主我陰陽甲曆咨

於四方上下無或差英曰依其法亦順君無念哉皇

曰無為後二十二易草木吳英氏進曆於君曰曆起

甲寅皇曰甲日寅辰乃鳩衆於傳教臺告民示始甲

寅易二月天王升傳教臺乃集生民后女媧子無

之右上相共工下相皇桓飛龍朱襄氏潛龍吳英氏

居君左右栗陸氏居北赫胥氏居南昆連氏居西葛

天氏居東陰康氏居下九州之牧各統其人羣居於

外皇曰咨予上相共工我惟老極無為子惟扶我正

道咨告於民俾知甲曆日月歲時自茲始無或不記

子勿怠共工曰王居君臣之位無有勞君其念哉皇

曰下相皇桓我惟老極無為子惟扶我正道撫愛下

民同力咨告於民俾知甲曆日月歲時自茲始無或

不記子其勿怠桓曰居君臣之位無有勞君其念哉

黃帝有熊氏始立靈臺設五官

按史記五帝本紀不載 按外紀帝既受河圖得其

五要乃設靈臺立五官以敘五事命鬼臾區占星圖

苞授規正日月星辰之象於是乎有星官之書命羲

和占日尚儀占月車區占風命大撓探五行之情占

斗剛所建始作甲子命容成作蓋天以象周天之形

綜六術以定氣運六術者謂義和占日常儀占月與

區占星氣伶倫造律諫首作算數大撓作甲子也

按古三墳皇曰岐伯天師爾司日月星辰陰陽曆數

爾正爾考無有差貸先時者殺不及時者殺爾惟戒

說作式

少昊金天氏始設鳳鳥氏為曆正統四時諸司

按左傳昭公十七年秋郊子來朝公與之宴昭子問

焉曰少皞氏鳥名官何故也郊子曰吾祖也我知之

昔者黃帝氏以雲紀故為雲師而雲名炎帝氏以火紀故為火師而火名共工氏以水紀故為水師而水名大皞氏以龍紀故為龍師而龍名我高祖少皞氏之立也鳳鳥適至故紀於鳥為鳥師而鳥名鳳鳥氏歷正也元鳥氏司分者也伯趙氏司至者也青鳥氏司啓者也丹鳥氏司閉者也

鳳鳥知天時故以名歷正之官元鳥燕也以春分來秋分去伯趙伯勞也以夏至鳴冬至止青鳥鵲也立春鳴立夏止丹鳥鵲也立秋來立冬去入大水為曆上四鳥皆歷正之屬

屬民
按國語楚昭王問於觀射父曰周書所謂重黎實使天地不通者何也若無然民將能登天乎對曰非此之謂也古者民神不雜

雜會也謂司民司神之官各異
民之精爽不憊貳者而又能齊肅衷正其知能上下比義其聖能光遠宣朗其明能光照之其聰能聽徹之如是則明神降之在男曰覲在女曰巫是使制神之處位次主

處居也位祭位也次主其尊卑先後也
而為之牲器時服而後使先聖之後之有光烈而能知山川之號高祖之主宗廟之事昭穆之世齊敬之勤禮節之宜威儀之則容貌之崇忠信之質禪潔之服而敬恭明神者以為之祝

祝太祝也掌祈福祥
使名姓之後能知四時之生

名姓謂舊族若伯夷炎帝之後為堯秩宗生嘉穀韭卵之屬

犧牲之物玉帛之類采服之儀彝器之量次主之度屏攝之位

度疏數之度屏屏風也攝形如今要扇皆所以分別尊卑為祭祀之位

壇場之所上下之神氏姓之出而心率舊典者為之宗

宗宗伯也掌祭祀之禮

於是乎有天地神民類物之官謂之五官各司其序不相亂也民是以能有忠信神是以能有明德民神異業敬而不瀆故神降之嘉生民以物享禍災不至求用不匱及少皞之衰也九黎亂德民神雜糅不可方物夫人作享家為巫史

嘉生善物也九黎黎氏九人也夫人人人也

無有要質民匱於祀而不知其福烝享無度民神同位民瀆齊盟無有嚴威神狎民則不錫其為嘉生不降無物以享禍災荐臻莫盡其氣顓頊受之乃命南正重司天以屬神命火正黎司地以屬民使復舊常無相侵瀆是為絕地天通其後三苗復九黎之德堯復育重黎之後不忘舊者使復興之

南陽位正長也司主也屬會也所以會羣神使各有分序不相干亂也周禮則宗伯掌祭也唐尚書云火當為北北陰位也周禮則司徒掌土地人民也絕地天通謂絕地民與天神相通之道三苗九黎之後也三苗為亂行其凶德如九黎之為也育長也堯平三苗之亂繼育重黎之後使復興典天

地之官義氏和氏是也

以至於夏商故重黎氏世敘天地而別其分主者也其在周程伯休父其後也當宣王時失其官守而為司馬氏寵神其祖以取威於民曰重實上天黎實下地遭世之亂而莫之能禦也

程國也伯爵也休父名也失官守謂失天地之官而以諸侯為大司馬寵尊也言休父之後世尊神其祖以威耀其民言重能舉上天黎能抑下地今相遠故不復通也亂謂幽平以下也

不然夫天地成而不變何比之有

言天地體成不復改變也何比之有言不相比近也

陶唐氏

帝堯陶唐氏元載命義氏和氏作曆象以授人時按書經堯典乃命羲和欽若昊天曆象日月星辰敬授人時分命羲仲宅嵎夷曰暘谷寅賓出日平秩東作日中星鳥以殷仲春厥民析鳥獸孳尾申命羲叔宅南交平秩南訛敬致日永星火以正仲夏厥民因鳥獸希革分命和仲宅西日昧谷寅饒納日平秩西成宵中星虛以殷仲秋厥民夷鳥獸毛毨申命和叔宅朔方日幽都平在朔易日短星昴以正仲冬厥民

隩鳥獸氄毛帝曰咨汝羲暨和三百有六旬有六日以閏月定四時成歲允釐百工庶績咸熙

孔重黎之後義氏和氏世掌天地四時之官故堯命之使敬順昊天昊天言元氣廣大星四方中星辰日月所會曆象其分節敬記天時以授人也此舉其目下別序之馬云義氏掌天官和氏掌地官

按竹書紀年帝堯陶唐氏元年命羲和曆象

周

周制設大史小史統馮相保章之屬以序歲時日月以辨星野妖祥雲物吉凶而隸於春官宗伯

按禮記月令孟春之月乃命太史守典奉法司天日月星辰之行宿離不貸毋失經紀以初為常

按周禮春官宗伯禮官之屬大史下大夫二人上士四人小史中士八人下士十有六人府四人史八人胥四人徒四十人

大史史官之長

大史掌建邦之六典以逆邦國之治掌灋以逆官府之治掌則以逆都鄙之治

典則亦灋也逆迎也六典八灋八則冢宰所建以治百官大史又建焉以為王迎受其治也大史

日官也春秋傳曰天子有日官諸侯有日御日官居卿以底日禮也日御不失日以授百官於朝居

猶處也言建六典以處六卿之職

凡辨灋者攷焉不信者刑之凡邦國都鄙及萬民之有約劑者藏焉以貳六官六官之所登若約劑亂則

辟灋不信者刑之正歲年以序事頒之於官府及都鄙

中數曰歲朔數曰年中朔大小不齊正之以閏

若今時作曆日矣定四時以次序授民時之事春秋傳曰閏以正時時以作事以厚生生民之本

於是乎在

頒告朔於邦國

天子頒朔於諸侯諸侯藏之祖廟至朔朝於廟

告而受行之鄭司農云頒讀為班班布也以十二月朔布告天下諸侯故春秋傳曰不書日官失之也

閏月詔王居門終月

門謂路寢門也鄭司農云月令十二月分在青陽明堂總章元堂左右之位惟閏月無所居居於門故於文王在門謂之閏

大祭祀與執事卜日

執事大卜之屬與之者當視墨戒及宿之日與羣執事讀禮書而協事祭之日執書以次位常辨事者攷焉不信者誅之大會同朝覲以書協禮事及將幣之日執書以詔王大師抱天時與大師同車

大師同車

鄭司農云大出師則大史主抱式以知天時處吉凶史官主知天道故國語曰吾非瞽史焉知天道春秋傳曰楚有雲如衆赤鳥夾日以飛楚子使問諸周大史大史主天道

小史掌邦國之志奠繫世辨昭穆若有事則詔王之忌諱

馮相氏中士二人下士四人府二人史四人徒八人馮乘也相視也世登高臺以視天文之次序天文屬大史月令曰乃命大史守典奉灋司天日月

星辰之行宿離不貸貸音忒

馮相氏掌十有二歲十有二月十有二辰十有二星有八星之位辨其敘事以會天位

歲謂太歲歲星與日同次之月斗所建之辰樂說說歲星與日常應太歲月建以見然則今曆太

歲非此也歲日月辰星宿之位謂方面所在辨其敘事謂若仲春辨秩東作仲夏辨秩南訛仲秋辨秩西成仲冬辨在朔易會天位者合此歲日月辰星宿五者以為時事之候若今曆日太歲在某月某日某甲朔日直某也國語曰王合位於三五孝經說曰故勅以天期四時節有晚早趣勉趣時無失天位皆由此術云

冬夏致日春秋致月以辨四時之敘

冬至日在牽牛景丈三尺夏至日在東井景尺五寸此長短之極極則氣至冬無愆陽夏無伏陰春分日在婁秋分日在角而月弦於牽牛東井亦以其景知氣至不春秋冬夏氣皆至則是四時之敘正矣

保章氏中士二人下士四人府二人史四人徒八人保守也世守天文之變

保章氏掌天星以志星辰日月之變動以觀天下之遷辨其吉凶

志古文識識記也星謂五星辰日月所會五星有贏縮圍角日有薄食暈珥月有盈虧眊側匿之變七者右行列舍天下禍福變移所在皆見焉

以星土辨九州之地所封域皆有分星以觀妖祥

星土星所主土也封猶界也大界則曰九州州中諸國中之封域於星亦有分焉其書亡矣堪輿

雖有郡國所入度非古數也今其存可言者十二次之分也星紀吳越也元枵齊也娵訾衛也降婁

魯也大梁趙也實沈晉也鶉首秦也鶉火周也鶉尾楚也壽星鄭也大火宋也析木燕也此分野之

妖祥主用客星彗孛之氣爲象

以十有二歲之相觀天下之妖祥

注歲謂太歲歲星與日同次之月斗所建之辰也

歲星爲陽右行於天太歲爲陰左行於地十二歲

而小周其妖祥之占廿氏歲星經其遺象也

以五雲之物辨吉凶水旱降豐荒之祲象

注物色也視日旁雲氣之色降下也知水旱所下

之國鄭司農云以二至二分觀雲色青爲蟲白爲

喪赤爲兵荒黑爲水黃爲豐故春秋傳曰凡分至

啓閉必書雲物爲備故也故曰凡此五物以詔救

政

以十有二風察天地之和命乖別之妖祥

注十有二辰皆有風吹其律以知和不其道亡矣

春秋襄十八年楚師伐鄭師曠曰吾驟歌北風又

歌南風南風不競多死聲楚必無功是時楚師多

凍其命乖別審矣

凡此五物者以詔救政訪序事

注訪謀也見其象則當預爲之備以詔王救其政

且謀今年天時占相所宜次序其事

漢

漢設太史太卜令丞而統於太常

按漢書百官公卿表太常屬官有太樂太祝太宰太

史太卜太醫六令丞

後漢

後漢設太史令以掌天時星曆明堂靈臺二丞佐之

皆統於太常

時星曆凡歲將終奏新年曆凡國祭祀喪娶之事掌
奏良日及時節禁忌凡國有瑞應災異掌記之丞一
人明堂及靈臺丞一人二百石本注曰二丞掌守明
堂靈臺靈臺掌候日月星氣皆屬太史

注漢官儀太史待詔三十七人其六人治曆三人

龜卜三人廬宅四人日時三人易筮二人典禮九

人籍氏許氏典昌氏各三人嘉法請雨解事各二

人醫二人靈臺待詔四十二人其十四人候星二

人候日三人候風十二人候氣三人候晷景七人

候鍾律一人舍人

晉

晉設太史令丞統於太常而別置靈臺丞

按晉書職官志太常有博士協律校尉員又統太學

諸博士祭酒及太史太廟太樂鼓吹陵等令太史又

別置靈臺丞

宋

宋仍設太史令統於太常

按宋書百官志太常太史令一人丞一人掌三辰時

日祥瑞妖災歲終則奏新曆太史三代舊官周世掌

建邦之六典正歲年以序事頒朔於邦國又有馮相

氏掌天文次序保章氏掌天文今之太史則并周之

太史馮相保章三職也漢西京曰太史令漢東京有

二丞其一在靈臺

南齊

南齊設太史令丞仍隸於太常

按南齊書百官志太常領太史令一人丞一人

梁設太史令丞及靈臺丞仍隸於太常

按隋書百官志太常卿視金紫光祿大夫統明堂二

廟太史太祝廩犧太樂鼓吹乘黃北館典客館等令

丞太史別有靈臺丞

陳

陳承梁設太史令仍隸於太常

按隋書百官志陳承梁皆循其制官其所制品秩太

常卿秩二千石品第三太史令六百石品第五

北魏

孝文帝太和 年詔議官制定太史博士等官階

品

按魏書高祖本紀不載 按官氏志自太祖至高祖

初其內外百官屢有減置或事出當時不爲常目舊

令亡失無所依據太和中高祖詔羣寮議定百官著

於今太史博士太卜博士太常日者從第七品下太

史助教第九品中

北齊

北齊置太史令丞統於太常

按隋書百官志太常屬官有太史署令丞兼領靈臺

太卜二局丞太史掌天文地動風雲氣色律曆卜筮

等事靈臺掌天文觀候太卜掌諸卜筮

北周

北周置太卜小卜龜占諸大夫士

按杜佑通典周官太卜掌三兆之法後周有太卜大

夫小卜上士龜占中士

隋

隋置太史曹令丞隸於祕書省

按隋書百官志高祖既受命改周之六官其所制名多依前代之法置祕書省領著作太史二曹太史曹置令丞各二人司曆二人監候四人其曆天文漏刻視祿各有博士及生員太史令爲從七品太史局丞爲正九品太史監候太史司曆爲從九品按天文志高祖平陳得善天官者周墳爲太史令墳博考經書勤於教習自此太史觀生始能識天官

煬帝大業三年改太史局爲監後又以監爲令而諸員亦各有增減
按隋書煬帝本紀不載按百官志煬帝即位多所改革三年定令改太史局爲監進令階爲從五品又減丞爲一人置司辰師八人增置監候爲十人其後又改監少監爲令少令

煬帝大業年遣宮人就太史局教以星氣
按隋書煬帝本紀不載按天文志煬帝遣宮人四十人就太史局別詔袁充教以星氣業成者進內以參占驗

唐

唐設司天臺監始置春夏秋冬中官之屬仍設保章正靈臺郎

按唐書百官志司天臺監一人正三品少監二人正四品上丞一人正六品上主簿二人正七品上主事一人正八品下監掌察天文稽曆數凡日月星辰風雲氣色之異率其屬而占有通元院以藝學召至京師者居之凡天文圖書器物非其任不得與焉每季錄祥書送門下中書省紀於起居注歲終上送史館歲頒曆於天下

注武德四年改太史監曰太史局祕祕書省七年廢監候龍朔二年改太史局曰祕書閣局令曰祕書閣郎中武后光宅元年改太史局曰渾天監不隸麟臺俄改曰渾儀監置副監及丞主簿改司辰師曰司辰長安二年渾儀監復曰太史局廢副監及丞隸麟臺如故改天文博士曰靈臺郎曆博士曰保章正景龍二年改太史局曰太史監不隸祕書省復置丞景雲元年又爲局隸祕書省踰月爲監歲中復爲局二年改曰渾儀監開元二年復曰太史監改令爲監置少監十四年太史監復爲局以監爲令而廢少監天寶元年太史局復爲監自是不隸祕書省乾元元年曰司天臺藝術人韓穎劉恆建議改令爲監置通元院及主簿置五官監候及五官禮生十五人掌布諸壇神位五官楷書手五人掌寫御書有令史五人天文觀生九十八天文生五十人曆生五十五人初有天文博士二人正八品下曆博士一人從八品上司辰師五人正九品下裝書曆生掌候天文掌教習天文氣色掌寫御曆後皆省

掌寫御曆後皆省
春官夏官秋官冬官中官正各一人正五品上副正各一人正六品上掌司四時各司其方之變異冠加一星珠以應五緯衣從其方色元日冬至朔望朝會及大禮各奏方事而服以朝見

注乾元三年置五官正及副正
五官保章正二人從七品上五官監候三人正八品下五官司曆一人從八品上掌曆法及測景分至表準

五官靈臺郎各一人正七品下掌候天文之變五官挈壺正二人正八品上五官司辰八人正九品上漏刻博士六人從九品下掌知漏刻凡凡壺爲漏浮箭爲刻以考中星昏明更以擊鼓爲節點以擊鐘爲節
注武后長安二年置挈壺正乾元元年與靈臺郎保章正司曆司辰皆加五官之名有漏刻生四十八人典鐘典鼓三百五十人初有刻漏視品刻漏典事掌知刻漏檢校刻漏後皆省

遼

遼設司天監置太史令統司曆靈臺郎等員
按遼史百官志南面朝官遼有北面朝官矣既得燕代十有六州乃用唐制復設南面三省六部臺院寺監諸衛東宮之官

司天監有太史令有司曆靈臺郎挈壺正五官正丞主簿五官靈臺郎保章正司曆監候挈壺正司辰刻漏博士典鐘典鼓

宋

宋初設司天監置監少監丞統五官靈臺保章之屬及修官制罷司天監立太史局有令正等官隸祕書省

按宋史職官志司天監監少監丞主簿春官正夏官正中官正秋官正冬官正靈臺郎保章正挈壺正各一人掌察天文祥異鐘鼓漏刻寫造曆書供諸壇祀祭告神名版位晝日監及少監闕則置判監事二人以五官正充
禮生四人曆生四人掌測驗渾儀同知算造王式元豐官制行罷司天監立太史局隸祕書省

太史局掌測驗天文考定曆法凡日月星辰風雲氣候祥青之事日具所占以聞歲頒曆於天下則預造進呈祭祀冠昏及大典禮則撰所用日其官有令有正有春官夏官中官秋官冬官正有丞有直長有靈臺郎有保章正其判局及同判則選五官正以上業優考深者充保章正五年直長至今十年一遷惟靈臺郎試中乃遷而挈壺正無遷法其別局有天文院測驗渾儀刻漏所掌渾儀臺晝夜測驗辰象鐘鼓院掌文德殿鐘鼓樓刻漏進牌之事

印曆所掌雕印曆書南渡後並同隸祕書省長貳丞郎輪季點檢

算學元豐七年詔四選命官通算學者許於吏部就試其合格者上除博士中次爲學諭元祐元年初議者謂本監雖准朝旨造算學元未興工其試選學官亦未有應格竊慮徒有煩費乞罷修建崇寧三年遂將元豐算學條制修成勅令五年罷算學令附於國子監十一月從薛昂請復置算學大觀三年太常寺考究以黃帝爲先師自常先力牧至周王朴以上從祀凡七十人四年以算學生併入太史局宣和二年詔並罷官吏

太宗太平興國二年冬十二月丁巳朔試諸州所送天文術士隸司天臺無取者黥配海島

按宋史太宗本紀云云

金設司天臺提點監少監掌天文曆數之事而隸於祕書監

按金史百官志司天臺提點正五品監從五品掌天

文曆數風雲氣色密以奏聞少監從六品判官從八品教授舊設二員正大初省一員

注係籍學生七十六人漢人五十人女直二十六人試補長行

司天管勾從九品

注不限資考員數隨科十人設一員以藝業尤精者充

長行人五十人

注未受執事者試補管勾

天文科女直漢人各六人算曆科八人三式科四人測驗科八人漏刻科二十五人

注銅儀法物舊在法物庫貞元二年始付本臺

凡司天臺學生女直二十六人漢人五十人聽官民家年十五以上三十以下試補又三年一次選草澤人試補其試之制以宣明曆試推步及婚書地理新書試合婚安葬并易筮法六壬課三命五星之術

元初因金制設司天臺兼設回回司天後設太史院與臺並建以頒曆之政歸院以學校之設隸臺

按元史百官志司天監秩正四品掌凡曆象之事提點一員正四品司天監三員正四品少監五員正五品丞四員正六品知事一員令史二人譯史一人通事兼知印一人屬官提學二員教授二員並從九品學正二員天文科管勾二員算曆科管勾二員三式科管勾二員測驗科管勾二員漏刻科管勾二員並從九品陰陽管勾一員押宿官二員司辰官八員天文生七十五人中統元年因金人舊制立司天臺設

官屬至元八年以上都承應關官增置行司天監十五年別置太史院與臺並立頒曆之政歸院學校之設隸臺二十三年置行監二十七年又立行少監皇慶元年陞正四品延祐元年特陞正三品七年仍正四品

同回司天監秩正四品掌觀象衍曆提點一員司天監三員少監二員監丞二員品秩同上知事一員令史二員通事兼知印一人奏差一人屬官教授一員天文科管勾一員算曆科管勾一員三式科管勾一員測驗科管勾一員漏刻科管勾一員陰陽人十八人世祖在潛邸時有旨徵回回爲星學者札馬剌丁等以其藝進未有官署至元八年始置司天臺秩從五品十七年置行監皇慶元年改爲監秩正四品延祐元年陞正三品置司天監二年命祕書卿提調監事四年復正四品

司天散官一十四欽象大夫從三品明時大夫頒朔大夫以上正四品保章大夫從四品司元大夫正五品授時郎從五品靈臺郎正六品候儀郎從六品司正郎正七品平秩郎從七品正紀郎挈壺郎以上正八品司曆郎司辰郎以上從八品

右司天品秩一十四階自欽象至司辰由從三品至從八品從三品至五品爲宣授六品至八品爲勅授勅授則中書署牒宣授則以制命之

太史院秩正三品掌天文曆數之事至元十五年始立院置太史令等官一員至大元年陞從二品設官十員延祐三年陞正二品設官十五員後定置院使五員正二品同知二員正三品僉院二員從三品同

僉二員正四品院判二員正五品經歷一員從五品都事一員從七品管勾一員從九品令史三人譯史

一人知印二人通事一人宣使二人典史二人

春官正兼夏官正一員正五品秋官正兼冬官正中

官正一員正五品保章正五員正七品保章副五員

正八品掌曆二員正八品腹裏印曆管勾一員從九

品各省司曆十二員正九品印曆管勾二員從九品

靈臺郎一員正七品監候六員從八品副監候六員

正九品星曆生四十四員挈壺正一員從八品司辰

郎二員正九品燈漏直長一人教授一員從八品學

正一員從九品校書郎二員正八品

成宗元貞二年冬十二月丁未復司天臺觀星戶

按元史成宗本紀云云

明

明欽天監設監正副統五官靈臺保章挈壺之屬

按明會典欽天監正官監正一員監副二員

首領官主簿一員

屬官春夏中秋冬官正各一員五官靈臺郎四員

舊八員

五官保章正一員

舊二員

五官挈壺正一員

舊二員

五官監候二員

舊三員

五官司曆二員五官司晨二員

舊八員

漏刻博士一員

舊六員

南京欽天監監正一員

舊有監副一員後革

主簿一員春夏中秋冬官正各一員

內止選一員

五官靈臺郎二員五官監候一員五官司曆一員

舊有同回監官後俱革止設同回科博士三員今亦

革

凡欽天監官不由常選監正監副有缺於本監官內

五官正五官靈臺郎缺於屬官內保章正以下缺於

天文生內俱從禮部選定送部奏補

凡推算日月交食本監先期備開分秒時刻并起復

方位具奏禮部通行內外諸司臨時救護食畢本監

仍按占書具奏如食不及一分與同回曆雖食一分

以上俱不行救護至救護時本監官專報時候不隨

班行禮如遇陰雨不見食本監官候復完時報各官

行四拜禮而退

凡歲造大統曆先期二月初一日進呈來歲曆樣然

後刊造一十五本送禮部差人齎至南京并各布政

司照樣刊印

凡每歲進御覽月令曆大統曆七政躔度曆洪武間

以九月初一日進後以十一月初一日進當日以大

統曆給賜百官頒行天下東宮曆同日於文華殿進

太皇太后皇太后中宮曆俱司禮監捧進本監仍具

本奏

凡頒曆後各王府差人於內府司禮監關領其內府

各衙門亦於司禮監給散如琉球占城等外國正統以前俱因朝貢每國給與王曆一本民曆十本今常給者惟朝鮮國王曆一本民曆一百本

凡天文生年六十以上者嫡男許告替補無嫡男者族丁許告習學仍照前例考補如缺役數多難以習

學子弟添充俟其考中方與收糧每歲冊籍止以祖戶一丁為戶首其續收補及餘丁各附祖戶之下不

許一族另立數戶一丁開寫數處希圖朦朧頂補凡天下府州縣舉到陰陽人堪任正術等官者俱從

吏部送本監考中送回選用不中者發回原籍為民原保官吏治罪

凡觀象臺譙樓合用燈油木炭及祭祀齋宮調品壺漏亦有油炭俱行禮部坐派順天府送用

凡本監俸糧初於禮部支給後從戶部撥本監自行收放今於祿米倉關支

凡本監造曆每年六月內從禮部發到曆樣刊印完給散南京各衙門并直隸各府州縣

凡占候天象本監自洪武以來設觀星臺於雞鳴山上今天文生分班晝夜觀望或有變異開具揭帖呈

堂上官當奏聞者隨即具奏凡天文生俱以世業子弟習學考選食糧分撥各科

凡本監造曆梨板顏料俱上元江寧二縣解納凡本監觀星臺每歲合用燈油木炭俱上元江寧二

縣解納本臺官生歲給禦寒毛襖一領從南京工部轉行內府甲字等庫關給

凡本監天文生食糧月支米六斗於南京禮部關支凡選郊祀時享等項日期每歲十一月中本監堂上